

RECORDANDO UN GRAN YIU DI TERA GILBERTO FRANCOIS BETICO CROES



Betico Croes,
aunke cu bo no tey mas cerca nos
e distancia entre nos no ta grandi y largo,
Abo cu tabata un gran politico Arubiano,
tabata stima bo pueblo,
pober y rico.

Betico Croes
abo tabata un hende di bon curazon
y cu semper tabata sa con y ki ora
pa defende e patria Aruba.
Abo a lucha cu sudor di bo frenta
pa e deseo asina anhela di bo pueblo aprecia.

Betico Croes,
ken por a pensa,
cu bo despedida tabata asina cerca?
Bo tabata un politica cu semper tabata tin oido
y semper tabata tin bo pueblo na pecho.

Betico Croes,
awor cu bo ta den cas celestial
nos lo keda recordabo den oracion.
Lo bo keda den historia di Aruba
como e amigo inolvidable,
como e luchador inigualable
y e Libertador di pais Aruba
Lo no tin otro pa reemplazabo,
pasobra den nos curazon
abo ta e Libertador di Aruba

Skirbi pa: Clarette Quandus.

BETICO, E LIBERTADOR

Bo ta e libertador
Cu'n cuero duro
Di un homber trahador:
Bo a ranca hopi mondi kibraa,
Corta staca, cera trankera
Y planta cunucu.

Bo ta e libertador
Cu a nabega den lama bruto,
Den tempo malo y orcan;
Hasta marca tin na bo man

Bo ta e libertador
Cu a demostra fortaleza,
Cu tur tempo a siña warda bo,
Cu a demostra hombresa

Bo ta e libertador
Cu a saca mi por di scuridad
Cu awe bo mes no por a disfruta
Di e fruta bon cosecha.

I.R. Croes
1 Januari 1986.

UN GRAN YIU DI TERA

For di e pueblo di Santa Cruz
A nace un gran yiu di tera
Cu a logra pa Aruba por tin
Su Himno y su Bandera

For di e pueblo di Santa Cruz
A nace un gran politico
Su logronan a keda den historia
Y su nomber simplemente BETICO

For di e pueblo di Santa Cruz
A nace nos libertador
Un homber cu vision y curashi
Un gran luchador

Na 1986 Aruba a nace como pais
Pero Betico no a wak esaki bira realidad
Santa Cruz y Aruba henter por ta orguyoso
Cu Betico a logra Aruba su libertad.

22 - 1- 1998
Norman Thijsen

RECORDAR ES VIVIR

Riot Commando di
Corsow a faya,
Polis entrena especial na
Aruba a faya,
Hulandesnan politico pa
Aruba a faya,
Tur otro politiconan na
Aruba a faya,
BETICO CROES no a
faya,
BETICO CROES a
fayece misterioso y
silencioso,
pero.....como nos
LIBERTADOR

Amigo
Harold Larmonie
Savaneta 270-C